

aiferroient, li signour et lez bonnes villes, qui sont de ces trues, doivent paier einci, com li noef dessus nommeis cognoistront et ordeneront, que raisons serait. (26) Et doivent demoreir tuit li signour, li gentilhommes et les bonnes villes an lour drois et franchises, anci com il ont fait jusques aci, et ne lour doivent kant ad ceu ces presentes trues venir a nulz prejudice, cez presentes covenances demerant toute voies an lour vertus durant le temps dez dictes trues. Et nous li signour et bonnes villes aipartenans a ces communes trues avons crantei et jurei, que pour ailiances ne pour covenances, que nous aiens ai cui que se soit, nous ne poons ne devons alleir encontre ces communes trues ycelles durant, ains lez devons tenir et faire tenir en la maniere, quelles sont escriptes an ces lettres. (27) Nous nous sommes auci acordeis communement a ceu, que nous par nos sairmens devons metre main ou faire metre a toz ceaulz, qui seroient grevans az treves et que seroient de mavais faixines ou renommeies, li queilz yroient ou chevaucheroient on pourpris des dites communes trues tant avant, com nous porrons et les devons poursuivre toutes fois, que denuncies nous seront par les noef ou par la plus grant partie deaulz. Et les devons par nos sairmens airester et faire justice de aulz selonc lour meffais selonc ceu, quil averoient deservit, enci com nous sairons, quil serait profitables et necessaires au pays, et ne les puent deffendre ne aidier kant ai ceu franchises, que li signeurs ou lez bonnes villes aient sens mal anging. (28) Et se il avenoit, com preist fors maixons a force, elles se doivent aibaitre sens reffaire, et quicunques se vouroit anforcier dou refaire, fut durant ces trues ou aipres, nous sommes et serons tenus dou contresteir et ad ceu obligons nous et nos hoirs. Et li biens, com painroit dedens, se doivent deduire a rowairt des noef. Et se cil de dedens sont pris a force, li gentilhomes averont les testes copeies et li autres seront penduis sens delay. (29) Et se aucuns dez seelz des signours ou des bonnes villes dessus nommeies nestoient mis en ces presentes lettres ou que aucun des dis signeurs et bonnes villes ne voucissent estre de ces communes trues, pour ceu ne seroit mies, que ces communes trues quant a ceaulz, qui saielleroient ces lettres et qui estre en vouroient, ne demoreissent en vallour. Et duerront cez presentes trues jusques au jour de la feste saint Martin dyver prochenment venant, que serait lan mil trois cens quairante et cinc. (30) Et doivent li noef estaulbir une bonne chaivetenne¹ por gardeir ces presentes trues, li queilz jurerait sor sains, que bien et loialment se porte-

1) 1345 Symon de Helfeldinga capitaneus. Siehe S. 371 in n. LXXI.